



JUDICIAL SYSTEM MONITORING PROGRAMME
PROGRAMA MONITORIZASAUN BA **SISTEMA** JUDISIÁRIU

Komunikadu Imprensa

Parlamentu Nasional

18 Novembru 2014

**Karta Primeiru Ministru reprezenta presaun polítku ba servisu
Parlamentu Nasional**

Iha 22 Outubru 2014, Meja Parlamentu Nasional (PN) simu karta ofisiál ida hosi Primeiru Ministru Kay Rala Xanana Gusmão.

Karta ne'e ho intensaun atu husu PN hodi la autoriza hasai imunidade membru governu sira ne'ebé hetan alegasaun kriminál maibé seidauk iha faktu provadu, atu bele kontinua hala'o sira nia knaar to'o mandatu remata. Nune'e atividade governativu la'o di'ak, la kloka iha risku sériu ba sustentabilidade governu no governasaun nasaun nian.

Artigu 113 Konstitusaun RDTL define katak, wainhira membru Governu ida akuzadu loloos ba krime, ne'ebé bele simu kastigu iha kadeia boot liu tinan rua nian, tenke para hala'o servisu atu bele foti prosesu. Signifika imunidade membru governu ida automaticamente suspendidu, maibe normalmente, tribunal husu autorizasaun ba Parlamentu Nasional atu hasai membru governu ne'e nia imunidade hanesan akontese ona.

Iha 04 Novembru 2014, meja PN ofisiálmente distribui karta ne'e ba bankada parlamentar sira atu hetan apresiasaun bazeia ba Artigu 114 Konstitusaun RDTL. Iha artigu ne'e define katak la iha Membru Governu ida bele hetan detensaun ka dadur bainhira PN la fó lisensa, esepetu ba krime dolozu ne'ebé bele kastigu ho sentensa másimu ba prizaun liuhosi tinan rua no iha “*flagrante delitu*” (kaer ho liman).

“JSMP enkoraja PN atu respeita Konstitusaun RDTL ne'ebe define katak tribunal sira la presiza aprovasaun hosi PN atu komesa prosesu hasoru membru governu

ne’ebé akuza ho krime sira ne’ebé kondena ho pena tinan rua ba leten. Iha situasaun hanesan ne’e, membru governu tenke suspendidu automatikamente” dehan Diretor Ezekutivu JSMP, Luis de Oliveira Sampaio.

JSMP hanoin katak artigu 114 Kontituisaun ne’ebé kaer nu’udar referensia legal ba pedidu ne’e la justifikavel tanba artigu ne’e mós difine kellas ona nia esepsaun katak artigu ne’e so bele aplika ba krime sira ne’ebé nia limite masimu la ass liu tinan rua prizaun ka krime ne’ebé laos iha sirkunstánsia *flagrant delitu*”.

Tuir Kódigu Penál aplikavel ba krime sira ne’ebé ho natureza korupsaun (krime iha funsaun públíku nia ezersisiu) maioria hatur nia pena abstratu ho tinan rua prizaun ba leten, tanba artigu 114 la relevante atu konsidera.

Mesmu karta ne’e ho katakter “pedidu deit” maibe JSMP fiar katak karta ne’e bele hamosu multi-interpresataun no direje ba konklusaun ne’ebé negative no praktika hanesan ne’e hatur presaun politiku ba parlamentu atu lakovtribui haforsa sistema judisiariu liu-liu ba komprimisiu estadu atu kombate korrupsaun.

Komisáriu Komisaun Anti Korupsaun (CAC), Aderito Tilman iha nia intervensaun bainhira hala’ó audénsia ho Komisaun A PN, fó mós nia resposta relasiona ho karta PM nian, katak sé deputadu sira la hasai imunidade membru governu sira nian, tribunál sei la halo julgamentu ba krime sira ne’ebé ho natureza korupsaun no tribunál tenke hein to’o membru guvernú sira ne’e nia mandatu remata hafoin bele halo prosesu hasoru sira. Komisáriu CAC konsidera, “natureza hosi karta ne’e bele hafoer Timor Leste nia nasaun nia naran iha mundu internasional kona-ba ita nia prestasaun atu kombate korrupsaun.”

Iha tinan 2012, JSMP halo peskiza ba asuntu ne’e no hakerek relatoriu ida ne’ebé lansa ho titulu ‘Priviléjiu no Imunidade Parlamentár iha Timor-Leste’. Relatoriu ne’e bele hetan iha ne’e: <http://jsmp.tl/wp-content/uploads/2012/05/Privelejiu-no-Imunidade-Parlamentar-ih-a-Timor-Leste-Jun-2012-FINAL.pdf>

Atu hetan tan informasaun, favór ida kontaktu:

Luis de Oliveira Sampaio
Diretor Ezekutivu JSMP
Diresaun e-mail: luis@jsmp.minihub.org
info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl